

## Inatsisissatut siunnersuummut oqaaseqaatit

**Oqaaseqaatit nalinginnaasut**1. Inatsisissatut siunnersuutip tunuliaqutai

Nukissiornermi ikummatissat avatangiisinut akitsuutaat pillugit Inatsisartut inatsisaat 1. januar 2011-mi atuutilerpoq. Inatsisip atuuttunngortinniarnernani paasineqarpoq maleruagassat maannakkutut oqaasertaasa kingunerigaat, timmisartut umiarsuillu Kalaallit Nunaannut tikittut motoorinut ikummatissaq orsussaasivimminni sinneruttoq uuttortassagaat, taassumalu akitsuutaa akilerlugu.

Maleruagassat taakku timmisartunut umiarsuarnullu sugaluartunulluunniit tamanut atuupput, taamaattumillu ilaatigut kalaallit angallassinermik assartuinermillu ingerlatseqatigiiffiutaannik annernik (Airgreenland A/S, Royal Arctic Line A/S), kalaallit nunallu allamiut aalisartitseqatigiiffiutaannik, umiarsuarnik takornarianik angallassissutinik, ilaasartaatitut timmisartuussinernik ilaallu ilanngullugit eqquillutik.

Maleruagassat kingunerivaat motoorinut ikummatissap, umiarsuit timmisartulluunniit Kalaallit Nunaannut tikinneranni umiarsuup timmisartulluunniit orsussaasiviani sinneruttup tamatigut uttorneqartarnissaa (atuarneqartarnissaa). Tamatuma kinguninngua akitsuusigassamik nalunaarut akileraaruseriffimmut tunniunneqartussaavoq. Akitsuut akilernerneqartussaavoq timmisartup umiarsuulluunniit tikinnerata kingorna kingusinnerpaamik ullut 14-it qaangiunneranni.

Maleruagassat taakku suliffeqarfinnut il.il. pineqartunut aningaasatigut sunniutaasussat sania-tigut aammattaaq annertooujussuarmik allaffissulernissaq kingunerissavaat, tassa suliffeqarfinni taamatullu aamma akileraaruseriffimmi. Taassumalu sania-tigut akileraaruseriffik maleruagassat, assersuutigalugu aalisartitseqatigiiffinnut, umiarsuarnut takornarianik angallassissutinut aammalu ilaasartaatitut timmisartuussinernut atatillugu atuutsinniarlugit annertungaatsiartumik suliassaqaasaaq.

Naalackersuisut isumaqarput maleruagassat taakku allaffissornerujussuarmik suliakkiisussat landskarsip isertinnerusassaatut naatsorsuutigisanut naapertuutinningsut.

Aamma umiarsuit timmisartullu pineqartut, maleruagassat maanna atuuttut kingunerisaannik avatangiisinut sunniinerisa taasarialimmik allannguuteqarnissaat ilimagissallugu tunngavissaqanngilaq.

Aammattaaq aseruatiertoqarsinnaanerata kiisalu ajornartorsiornermi, umiarsuit timmisartulluunniit orsussamik useqarlutik Kalaallit Nunaannut tikittariaqalersinnaanerisa sillimaffigine-

qarnissaat naleqquttuosorineqarpoq, ajutoortoqarnerami tunngavigalugu ingerlatseqatigiiffinik tamakkuninnga aningaasatigut nammakkersuinissaq inatsisikkut kissaatigineqanngimmat.

Aamma inatsisip kingunerisaanik orsussamik umiarsuarnut timmisartunullu nunat tamat akornanni ingerlaartunut, kilisaatinut, illersornissaqarfiup nakkutilliisuinut, umiarsuarnut takornarianik angallassissutinut aammalu uuliasiornermik ingerlataqartunut tunisinermut atatillugu akitsuummik akiliisitsisoqassaaq.


Inatsisip atortuulernerani paasineqarpoq akitsuuteqartussaataitanerup taassuma kingunerigaa Kalaallit Nunaanni nioqquteqartut (Polaroil) nunat allamiut nioqquteqartui niuernerpalaartumik unammillersinnaanngikkaat. Nioqquteqartut isertitassamik taamaalillutik ukiumut 387 mio. kr.-it annaaratarsinnaavaat.

Akitsuuteqarfiusoq avammut 3 sømilinik killeqarfeqarpoq. Orsussaq sunaluunniit akitsuuteqarfiusumut eqqunneqartoq akitsuusigassaavoq. Taamaammat nunat allamiut nioqquteqartui akitsuuteqarfiusumukartanngillat, taamalu umiarsuarnut qillerivinnullu akitsuuteqarfiup avataaniittunut orsussamik tunisigaangamik akitsuummik akiliisitsisussaananik.

Akitsuutit nutaat kingunerisaannik Kalaallit Nunaanni nioqquteqartut unammillertiminnut nunanit allaneersunut naleqqiullutik aningaasartuuteqarnerulerput. Nioqquteqartut nioqqut taannarpiaq unammillertiminnit akisunerutissinnaannginnamikku sipaarniuteqartariaqarput, sinneqartoorutiminnik appaasariaqarput imaluunniit taamatut tuniniaajunaartariaqarlutik.

Polaroil-imut tunngatillugu niuerfiit marlunnut immikkoortitaapput. Sullissinissamik isumaqatigiissutip iluani niuerfik tassaavoq Polaroil-ip pilersuisussaataitaaffini naapertorlugu nuna tamakkerlugu assigiimmik akeqartitsiffissaa. Niuerfiup aappaa tassaavoq sullissinissamik isumaqatigiissutip saniatigut soorlu kilisaatinut, uuliasiornermik ingerlataqartunut umiarsuarnullu takornarianik angallassissutinut nioqquteqarneq.

Kisitsisini ataaniittuni takuneqarsinnaavoq Polaroil-ip sullissinissamik isumaqatigiissutip saniatigut tunisaasa ineriartornerat.

*Titartagaq 1: Sullissinissamik isumaqatigiissutip saniatigut tunisat liiterinngorlugit*

Inatsisikkut avatangiisinut akitsuummiit ukiumut 24 mio. kr.-it isertinneqartussatut missili-uunneqarput, taakkunanga 6 mio. kr.-it sullissinissamik isumaqatigiissutip saniatigut tunisaneersussatut.

Polaroil-ip sullissinissamik isumaqatigiissutip saniatigut tunisamigut isertitai suliffeqarfiup aningaasartuutaanik tamarmiusunik aningaasalersueqataapput. Suliffeqarfiup nalunaarutigaa isertitat taakku Polaroil-ip aningaasartuutaasa aalajangersimasut ingerlatsinermullu aningaasartuutaasa tamarmiusut 19 pct.-iinik aningaasalersuisuusut.

Polaroil nutartigassatigut 530 mio. kr.-it missinginik kinguaattooruteqarluni naatsorsuisimavoq (selskabi sumiiffinni assigiinngitsuni 70-ini tankeqarfeqarpoq). Nutartigassatigut kinguaattoorutit tamakkerlugit isumannaarneqassappata ukiut 15-it ingerlaneranni ukiumut 40-45 mio. kr.-it missingi immikkoortinneqartassapput. Allatut oqaatigalugu, aningaasartuutissat taakku ilaat sullissinissamik isumaqatigiissutip saniatigut tunisatigut isertitanit aningaasalersorneqarsinnaassapput. Sullissinissamik isumaqatigiissutip saniatigut tunisatigut isertitat appariaateqarnerisa kingunerissavaat sullissinissamik isumaqatigiissutip iluani atuisut nutartigassanut aningaasartuutitut amerlanerusunik matussusiisarnissaat.

Allatut oqaatigalugu, sullissinissamik isumaqatigiissutip saniatigut tunisat akitsuutaat orsusap sullissinissamik isumaqatigiissutip iluani atuisunut nalinginnaasunut tunineqartartup akisunerulerneranik kinguneqaratarsinnaavoq. Tamannaavorlu Naalakkersuisut inatsisissatut siunnersuutikkut ugguuna pinngitsoortinniagaat.

## 2. Inatsissatut siunnersuutip imai

Motoorinut ikummatissap Kalaallit Nunaannut tikinnermi timmisartut imaluunniit umiarsuit 200 bruttoregister-tonimik tassanngaluunniit annertunerusumik bruttotonnagellit bruttoregister-tonnagellilluunniit orsussaasivianniittup, umiarsuup timmisartulluunniit nammineq inger-

latissaatuinnaq naatsorsuussap ikummatissanut akitsuummik akitsuuserneqannginnissaa siunnersuutaavoq.

200 bruttoregister-tonimik killeqartitsinikkut qulakkeerniarneqarpoq angallatit minnerusut nunap iluani ingerlaartut motorinut ikummatissamik akitsuuteqarfiusup avataani orsernissamut pileritsatsinneqannginnissaat.

Siunnersuutip kingunerissavaa motorinut ikummatissap umiarsuup timmisartulluunniit orsussaasivianiittup pisuni taakkunani uttorneqannginnissaa, soorluttaaq akitsuusigassamik nalunaaruteqartoqassananilu akitsuummik akiliisoqassanngitsoq.

Motorinut ikummatissap pineqartup umiarsuup timmisartulluunniit pineqartup nammineq ingerlatissaatuinnaq naatsorsuussaanaissaa piumasaqaataavoq. Motorinut ikummatissaq siunertanut allanut, soorlu usinik usilersusseqqinnermi atorneqarpat taamatulluunniit atugassatut eqqarsaataappat, motorinut ikummatissaq inatsimmi maleruagassat nalinginnaasut naapertorlugit akitsuuserneqassaaq.

Akitsuusigassaanngitsoq taamaallaat tassaavoq motorinut ikummatissaq Kalaallit Nunaannut tikinnermi umiarsuup timmisartulluunniit nammineq orsussaasivianiittoq. Motorinut ikummatissaq alla tankini allaniitsinneqartoq uninngasuusivinniluunniit allaniitsinneqartoq akitsuusigassatut pineqartunut ilaaginnassaaq.

Aammattaaq siunnersuutaavoq motorinut ikummatissap akitsuutaanik akiliisussaataitanermi pineqartunut ilaassanngitsut timmisartut umiarsuilluunniit aseruaitersimasut ajornartorsiortulluunniit.

Siunnersuutip kingunerissavaa orsussap umiarsuarmi timmisartumiluunniit aseruaitersimasumiittup ajornartorsiortumiittulluunniit akitsuuteqarfiusumut tikinnermi akitsuuserneqannginnissaa, orsussaq umiarsuup timmisartulluunniit nammineq ingerlatissaatuinnaq naatsorsuussaanngikkaluarpalluunniit. Akitsuusiinnginnissamili piumasaqaataavoq umiarsuup akitsuuteqarfiusumut tikinnissaq ajornartorsiulernini sioqqullugu pilersaarutigisimassanngikkaa.

Tamakku saniatigut siunnersuutaavoq matumunnga inatsit (§ 1 a nutaaq) 1. juni 2011-mi atortuulissasoq, kingumoortumillu atuutissasoq 1. januar 2011-miit. Akitsuusigassaneq 1. juni 2011-imi atorunnaassappat akitsuut piffissami 1. januar 2011-imiit 15. juni 2011-imut akilerneqartoq utertinneqassaaq.

Kingumoortumik atortuulersitsinerup sunniutigissavaa akileraaruseriffiup 1. juni 2011-p kingorna piffissajaatigisariaarutissagaa, piffissamut 1. januar 2011-imiit 15. juni 2011-imut tunngatillugu akitsuusiinissamik atuutsitsinissaq pisariulluinnarunartoq.

Aamma siunnersuutaavoq suliffeqarfiit uninngasuutininik peqqumaasivittut nalunaarsorsimasut akitsuusigaanngitsumik uninngasuuteqarnissamut akuersissummik qinnuteqarsinnaanissaat. Akitsuusigaanngitsumik uninngasuutit taamallaat tassaasinnaapput nioqqutissat akitsuusigasat akitsuuteqarfiup avataanut anninneqartussatut naatsorsuussat, aammalu nioqqutissat akitsuusernagit umiarsuarnut timmisartunullu nunanut allanut ingerlaartunut nioqqutigineqartussatut naatsorsuussat. Tassa imaappoq akitsuuteqanngitsumik uninngasuuteqarnermi uninngasuuteqartup nioqqutissat uninngasuutininut ilanngunneqartut akitsuutaat akilissanngikkaa. Akitsuuteqanngitsumik uninngasuuteqarnerup siunertaraa nioqqutissat akitsuuteqanngitsumik nioqqutigineqartussatut naatsorsuussaareersut akitsuutaannik akiligassiinnginnissaq. Nioqqutissat akitsuuteqanngitsumik uninngasuutininut ilanngunneqartut kiassarnermut, innaallagissiornermut imaluunniit motorinut ikummatissatut akitsuusigassanut atorineqarpata akitsuut inatsimmi malerugassat nalinginnaasut naapertorlugit akilerneqassaaq.

Siunnersuutaavoq umiarsuarnut timmisartunullu nunanut allanut ingerlaartunut, umiarsuarnut uuliasiortunut gassisiortunullu kiisalu nunat allamiut aalisariutaannut tunisinerni akitsuuteqartitsisoqannginnissaa. Aamma siunnersuutaavoq kalaallit aalisariutaannut 200 tonsinik brutto-tonnage-linnut tunisat akitsuuteqartinneqassanngitsut. Akitsuuteqartitsinnginnissat umiarsuit timmisartullu pineqartut Kalaallit Nunaata avataani orsussamik akitsuuteqanngitsumik orser-sorsinnaanerannik pissuteqarpoq, taamaattumillu ingerlatat taakku akitsuuteqartinneqarnissaat siunertaqarnaviarani.

Aammattaaq siunnersuutaavoq naatsorsuusiorneq, akitsuutip akilerneqarnissaa, nioqqutissanik akitsuuteqanngitsumik pisiniarsinnaanerup atorunnaarsinneqarsinnaanera ilaallu ilanngulugit pillugit aalajangersakkanik aalajangersaasoqassasoq.

### 3. Pisortanut aningaasatigut allaffissornikkullu sunniutissai

Kontumi pingaarnermi 24.11.23-imi, Nukissiornermi ikummatissat avatangiisinut akitsuutaat, isertitassat siunnersuutip kingunerisaanik ukiumut 5 mio. kr.-inik appariaateqartussatut mis-siliuunneqarput.

Allanguut akileraaruseriffiup allaffissornermut nakkutilliinermullu naatsorsuutigineqarsimannngikkaluartunut tunngatillugu sulineranik millisitsissaaq.

### 4. Inuussutissarsiutinik ingerlataqartunut aningaasatigut allaffissornikkullu sunniutissai

Siunnersuut allaffissornermut aningaasatigullu oqilisaassissaaq, pingaartumik Kalaallit Nunaanni assartuineramik suliaqartunut anginernut.

Aamma siunnersuut Polaroil-ip orsussamik umiarsuarnut timmisartunullu nunat tamat akornanni ingerlaartunut ilaallu ilanngulugit nioqquteqarnermi unammillersinnaaneramik pitsanngoriartitsissaaq.

5. Avatangiisinut pinngortitamullu sunniutissai

Siunnersuutip avatangiisinut pinngortitamullu taasarialinnik sunniuteqarnissaa naatsorsuutigineqanngilaq.

6. Innuttaasunut aningaasatigut allaffissornikkullu sunniutissai

Siunnersuut, Kalaallit Nunaanni nioqquteqartut unammillersinnaanerisa pitsanngoriarnertigut atuisut nalinginnaasut aningaasartuutikinnerulaarnissaannik kinguneqarsinnaavoq.

7. Naalagaaffeqatigiinnermut Namminersorlutillu Oqartussanut tunngasut

Inatsisissatut siunnersut naalagaaffeqatigiinnermut tunngasunik imaqanngilaq.

8. Oqartussaasunik soqutigisaqaqatigiinnillu tusarniaaneq

Siunnersuut tusarniaassutigineqanngilaq.

**Inatsisissatut siunnersuummi aalajangersakkanut ataasiakkaanut oqaaseqaatit***§ 1-imut*

Nr. 1-imut

Imm. 1-imut

Motoorinut ikummatissap Kalaallit Nunaanni akitsuuteqarfiusumut tikinnermi timmisartut umiarsuilluunniit orsussaasiviiniittup akitsuusigassanut ilaatinneqannginnissaa siunnersuutaa-voq.

Motoorinut ikummatissap orsussaasivimmiittup umiarsuup timmisartulluunniit pineqartup nammineq ingerlatissaatuinnaq naatsorsuussaannissaa piumasaaqaataavoq. Motoorinut ikummatissap siunertanut allanut, soorlu usinik usilersuusseqqinnermi atorreqarpat taamatulluunniit atugassatut eqqarsaataappat motorinut ikummatissap inatsimmi maleruagassat nalinginnaasut naapertorlugit akitsuuserneqassaaq.

Umiarsuarnut tunngatillugu aammataaq piumasaaqaataavoq umiarsuup 200 bruttoregister-tonimik tassanngaluunniit annertunerusumik bruttotonnageqarnissaa bruttoregister-tonnageqarnis-saluunniit. Tasaq imaappoq umiarsuit mikinerusut, matumani aamma angallatit nuannaariutit aalajangersakkami pineqanngillat taamaattumillu akitsuut il.il. inatsimmi maleruagassat nalinginnaasut naapertorlugit akilerneqartassapput.

Akitsuusigassaanngitsoq taamaallaat tassaavoq motorinut ikummatissap Kalaallit Nunaannut tikinnermi umiarsuup timmisartulluunniit nammineq orsussaasivianiittoq. Umiarsuaq orsussaasiviup ataatsip saniatigut allamik tankeqarpat motorinut ikummatissap akitsuusigassaanngitsoq tassatuaavoq motorinut ikummatissap tankimut umiarsuup motorianut atasumut immiunneqartoq, motorinulli ikummatissap alla tankini (uninngasuusivinniluunniit allani) uninngasuutigineqartoq akitsuusigassaalluni.

Imm. 2-mut

Umiarsuit timmisartulluunniit orsussamik useqarlutik akitsuuteqarfiusumut tikinnerminni orsussap taassuma akitsuutaanik akiliisussaataannginnissaat siunnersuutaavoq, tamanna taamaallaat aseruaiternermik allatulluunniit ajornartorsiornermik pissuteqarpat, aammalu angallat ajornartorsiulernini sioqqullugu akitsuuteqarfiusumut tikinnissamik pilersaaruteqarsimanngippat.

Imm. 3-mut

Akitsuusiinninnissamut imm. 1-imi taaneqartumut atatillugu naatsorsuusiorneq nakkutillinerlu pillugit malittarisassat aalajangersarnissaannut Naalakkersuisut piginnaatinneqarnissaat siunnersuutaavoq. Naalakkersuisut ilaatigut aalajangersarsinnaassavaat umiarsuit timmisartullu Kalaallit Nunaanni angerlarsimaffeqartut motoorinut ikummatissamik atuinitik naatsorsuusiortassagaat, soorluttaaq akileraaruseriffiup naatsorsuutininik, umiarsuarnik timmisartunillu misissuiffiginnissinnaanera pillugu aalajangersagaliortoqarsinnaassasoq.

Nr. 2-mut

Imm. 1-imut

Siunnersuutigineqarpoq Akileraaruseriffik piginnaatinneqassasoq uninngasuutininik peqqumaasivittut nalunaarsorsimasut akitsuusigaanngitsumik uninngasuuteqarnissamut akuersissummik tuninissaannut. Akitsuusigaanngitsumik uninngasuutit taamallaat tassaasinnaapput nioqqutissat akitsuusigassat akitsuuteqarfiup avataanut anninneqartussatut naatsorsuussat, aammalu nioqqutissat § 7 a naapertorlugu akitsuusernagit nioqqutigineqartussatut naatsorsuussat.

Akitsuusigaanngitsumik uninngasuutininut tunngatillugu sumi uninngasuuteqarnissaq naatsorsuinerlu pillugit piumasaqaateqartoqarsinnaavoq.

Akitsuusigaanngitsumik uninngasuutit sumiitinneqarnissaat pineqartillugu tassaasinnaapput tanki tankeqarfilluunniit aalajangersimasoq ataaseq arlaqartulluunniit, nioqqutissallu peqqumaasivimmuut inissinneqartut uninngasuutininik peqqumaaviusup nioqqutissaataanit allanit avissaartinneqarsimassallutik. Akitsuusigaanngitsumik uninngasuutit pillugit naatsorsuineq pineqartillugu nioqqutissat uninngasuutininik peqqumaaviusup nioqqutissaataanit allanit avissaartinneqarsimassanngillat.

Akileraaruseriffik akitsuusigaanngitsumik uninngasuuteqarnissamut akuersissummik tunisnerminut atatillugu akitsuusigaanngitsumik uninngasuutit pillugit piumasaqaateqarsinnaavoq. Akileraaruseriffiup tamanna pillugu aalajangiinerani tunngaviussaaq ataatsimut naliliineq, tassa ilaatigut nalilerneqassallutik nioqqutissat akitsuusigassaanngitsut akitsuuteqarfiusumi tuninierneqaratarsinnaanerat, nioqqutissat akitsuusigaanngitsumik uninngasuutininut inissinneqartussat annertussusissaannut naatsorsuutigisat, uninngasuutininik peqqumaasiviusup akileraartarnermut, akitsuusiisarnermut akiliisitsiniartarnermullu inatsisit naapertorlugit pisussaaffimminik malinninnera pillugu akileraaruseriffiup misilittagai, uninngasuutininik peqqumaasiviusup aningaasaqarniarneranut tunngasut, matumani aamma pingaartumik pineqarluni uninngasuutininik peqqumaasiviusoq akiligassanik pisortat pisassaannik akiitsoqarnersoq.

Akitsuusigaanngitsumik uninngasuutit taamaallaat annertussuserisinnaavaat akitsuuteqarfiup avataanut anninneqartussatut naatsorsuutigisat imaluunniit § 7 a naapertorlugu akitsuuteqanngitsumik tunineqartussatut naatsorsuutigisat annertoqqataat. Akileraaruseriffiup akuersissuuteqarnermini uninngasuutininik peqqumaasiviusup akitsuuteqanngitsumik uninngasuutigisinnaasaasa annerpaaffissaat aalajangersinnaavaa.



## Imm. 2-mut

Imm. 2-mi siunnersuutigineqarpoq Naalakkersuisut akitsuusigaanngitsumik uninngasuutit pil-lugit erseqqinnerusunik maleruagassiornissamut piginnaatinneqassasut. Naalakkersuisut ma-tumani aamma naatsorsuusiornermi nakkutilliinermilu maleruagassiorsinnaapput, akuersissu-teqarnissamut piumasaqaasiorsinnaallutik akitsuutillu akilerneqarnissaata qulakkeernissaanut pingaarutillit allat aalajangersarsinnaallugit.

Aammattaq Naalakkersuisut akuersissutinik tunisinermut atatillugu qularnaveeqqusiinissa-mik piumasaqaateqarsinnaaneq pillugu maleruagassiorsinnaapput.

## Nr. 3-mut

Siunnersuut akitsuuteqanngitsumik uninngasuuteqarsinnaaneq pillugu siunnersuummi nr. 1-ip kinguneraa.

Siunnersuutaavoq nioqqutissat akitsuusigassat piffissamut akitsuuteqarfiusumut naatsorsorne-ranni nioqqutissat akitsuusigassat § 4 a, imm. 1 naapertorlugu akitsuuteqanngitsumik unin-ngasuutinut ilanngunneqarsimasut annertussusiat ilanngaaticigineqassasoq, nioqqutissat taakku tassuunakkut akitsuuserneqaqqunagit, kisianni aatsaat kiassarnermut, innaallagissiornermut imaluunniit motorit ikummatissaattut akitsuusigassatut atorneqanngippata. Taamatut atuiso-qartillugu akitsuut inatsimmi maleruagassat nalinginnaasut naapertorlugit akilerneqassaaq, tak. inatsimmi § 2, imm. 1.

## Nr. 4-mut

Siunnersuut akitsuusigassap annertussusianik naatsorsuineq pillugu siunnersuummi nr. 2-p ki-nguneraa.

§ 7, nr. 1 aamma 2, imarisamikku maanna atuuttut assigaat, oqaasertaalli allanngortinneqar-lutik.

Aalajangersakkami nr. 3 nutaajuvoq. Uninngasuutinik peqqumaasivittut nalunaarsorneqarsi-masut akitsuusigassanik naatsorsuinerminni, nioqqutissat umiarsuarnut timmisartunullu nuna-nut allanut ingerlaartunut il.il. (§ 7 a-tut siunnersuut, tak. inatsisissatut siunnersuummi nr. 4) tunineqartut taanna malillugu ilanngaaticigisinnaavaat. Aalajangersagaq § 7 a naapertorlugu akitsuuteqannginnissap qulakkeerneqarnissaanut periusissamik aalajangersaavoq.

## Nr. 5-imut

## Imm. 1-imut

Uninngasuutinik peqqumaasivittut nalunaarsorneqarsimasut nioqqutissanik umiarsuarnut tim-misartunullu nunanut allanut ingerlaartunut tunisaqarneranni akitsuusiisoqassanngitsoq aalaja-ngersakkatut siunnersuutigineqartumi allassimavoq.

Umiarsuit nunanut allanut ingerlaartutut isigineqartut ilaatigut tassaapput Royal Arctic Line A/S-ip umiarsuaatai atlantikoq ikaarlugu ingerlaartut aamma umiarsuit takornarianik angallasissutit Kalaallit Nunaanneersut nunanillu allaneersut, umiarsuit uuliasiortut gassisiortullu Kalaallit Nunaata avataani angerlarsimaffeqartut allallu. Akitsuusiisoqannginnissaanili pineqanngillat umiarsuit Kalaallit Nunaata iluani ingerlaartut, matumani aamma umiarsuit ilaasartaatit umiarsuillu pilersuinermi atorneqartut.

Angallatit uuliasiortutut gassisiortutullu isigineqarput umiarsuit uuliasiornermi gassisiornermilu peqataanissamut immikkut sanaajusimasut atortulersorneqarsimasulluunniit. Aalajangersakkami ilaatigut pineqarput umiarsuit qillerutit atorneqartut aamma umiarsuit sajuppillatsitsisarluni misissuineranut allanullu atugassatut atortulersorneqarsimasut.

Timmisartut nunanut allanut ingerlaartutut isigineqartut tassaapput timmisartut suulluunniit, matumani aamma timmisartut Kalaallit Nunaanni angerlarsimaffeqartutut nalunaarsorsimasut, nunami allami timmisartunut mittarfimmik toraagaqarlutik tingisut. Akitsuusiisoqannginnissaani pineqanngillat Kalaallit Nunaanni timmisartunut mittarfiit, heliportit aallallu akornanni timmisartornerit.

Aamma aalisariutit Kalaallit Nunaanni angerlarsimaffeqanngitsut kiisalu aalisariutit 200 bruttotonnage-mik imaluunniit bruttoregistertonage-mik taannalu qaangerlugu usisinnaasut, Kalaallit Nunaanni angerlarsimaffeqartut tamarmik akitsuusiisoqannginnissaani pineqartunut ilaanissaat siunnersuutaavoq.

Akitsuusiinnginnissaq umiarsuit timmisartullu pineqartut Kalaallit Nunaata avataani akitsuuteqanngitsumik orsorsinnaanerannik tunngaveqarpoq, taamaattumillu akitsuummik akiliisussaataitaneq maannakkut atuuttoq Kalaallit Nunaanni nioqquteqartunut unammillersinnaajunnaarnermik kinguneqassalluni.

Imm. 2-mut

Imm. 2-mi erseqqissarneqarpoq akitsuusiinnginnissami taamaallaat pineqarmata nioqqutissat umiarsuup, timmisartup, aalisariutilluunniit orsussaasivianut toqqaannartumik tunineqartut. Umiarsuaq arlalinnik orsussaasiveqarpat nioqqutissat orsussaasivimmut motorimut atasumut tunineqartut kisimik akitsuuserneqassanngillat, orsussaasivinnulli allanut tunineqartut akitsuusigassaassallutik.

Imm. 3-mut

Naalackersuisut akitsuummik akiliisussaataitannginnernut atatillugu naatsorsuusiordermi nakkutilliinermilu maleruagassanik aalajangersaanissamut piginnaatinneqarnissaat siunnersuutaavoq.

## Nr. 6-imut

Siunnersuut akitsuuteqanngitsumik uninngasuuteqarsinnaaneq pillugu siunnersuummi nr. 1-ip aamma akitsuuteqanngitsumik tunisisinnaaneq pillugu nr. 4-p kingunerisaannik allannguinsamik imaqarpoq.

Suliffeqarfiit § 3, imm. 1 naapertorlugu nalunaarsorneqarsimasut aalajangersagaq malillugu naatsorsuusiussapput, nioqqutissat assigiinngitsut immikkoortillugit akitsuusigassat annertussusiinik naatsorsuinissamut tunngaviusinnaasunik.

Naatsorsuutini ilaatinneqassapput nioqqutissat piiarneqartut, suliarineqartut eqqussorneqartut amerlissutaat imaluunniit akitsuusigaanngitsumik uninngasuutit ikilissutaat, kiisalu nioqqutissat § 7 a, imm. 1 naapertorlugu tunineqartut atorneqartullu.

## Nr. 7-imut

Umiarsuarnut timmisartunullu nunanut allanut ingerlaartunut il.il. akitsuuteqanngitsumik tunisisinnaaneq pillugu maleruagassat atornerlunniarneqarsinnaanerit pinngitsoorniarlugu siunnersuutigineqarpoq inatsimmi § 12 immikkoortunik nutaanik marlunnik ilaneqassasoq.

Siunnersuutigineqarpoq nioqqutissat akitsuusigassat § 7 a naapertorlugu akitsuusigassaajunnaartut atorneqarfissaminut naatsorsuussamit allaasumut atorneqarpata, suliffeqarfiup nioqqutissanik akitsuuteqanngitsumik pisisinnaanera akileraaruseriffiup atorunnaarsissinnaagaa. Aamma nioqqutissat taaneqartut akitsuutaat akileeqqusinnermiit kingusinnerpaamik ullut 14-it qaangiunneranni akileqqullugu suliffeqarfik peqquneqassaaq.

Atorunnaarsitsineq pissaaq suliffeqarfimmut pineqartumut toqqaannartumik nalunaaruteqarnikkut. Tamatuma saniatigut akileraaruseriffiup uninngasuutinik peqqumaasivittut nalunaarsorneqarsimasut nalunaarfigissavai suliffeqarfimmut pineqartumut nioqqutissanik akitsuuteqanngitsunik siunissami tunisaqaqqissanngitsut.

*§ 2-mut*

Siunnersuutaavoq inatsit 15. april 2011 atortuulissasoq.

Siunnersuutaavorli § 1 a-p, inatsimmi matumani nr. 1-imi oqaasertaligaasup nioqqutissanut 1. januar 2011-mi kingusinnerusumiluunniit akitsuusigassaalersussanut atuunnissaa. Akitsuusigassaaneq 15. april 2011-imi atorunnaassappat akitsuut piffissami 1. januar 2011-imiit 30. april 2011-imut akilerneqartoq utertinneqassaaq.